

জীবন পরিভ্রমা

মনে কর তোমার সঙ্গে
জলের নিচে ডুব দিয়েছি
হাতের মুঠোয় ফুলের রেণু

মনে কর তোমার সঙ্গে
সারাটা দিন পথে পথে
সারা দেহ ধুলোয় ধুলোয় বাজছে রেণু

মনে কর তোমার সঙ্গে
রূপমতী নীল বাংলায় একটি বাড়ি
চাতাল নেই, জানালা নেই, বাতাস-বাতাস
শুধুই খাড়াই উঠে গেছে একটা জীবন
এই পাড়ে সেই পদমূলে
ধ্যান ধারণা - রক্তমাংস - শিকড় বাকড়
তোমার আমার অমলকান্তি ছবি জুড়ে
হেমন্তে এক পাখি এসে ডিম পেড়ে যায়

মনে কর তোমার সঙ্গে
পুণ্যজলে বৈতরণী-এক জীবনের অন্নজলে
অঁধারে কোন বর্ণমালায়-'
থামতে পারি! ভাসতে পারি!

তোমার সঙ্গে আমিও এক
ছিন্নভূ বন - মগ্নস্মৃতি
ছায়া-ছায়া ঘুমের দেশে আলোকপাড়ে সহচরী
পানকৌড়ি ডানার নিচে তন্দ্রা আলোর উঁকিঝুঁকি
দেহমুক্ত আত্মা হয়ে দুজনাতেই দাঁড়িয়ে থাকি

শ্যামলকান্তি ভট্টাচার্য

